

Potpisan ugovor za projekat vrijedan više od 3,2 miliona KM

"Inovativnim umom do pametnih škola" ili skraćeno "Pametne škole", naziv je 3,2 miliona KM vrijednog projekta za čiju je implementaciju u utorak 30.05.2017. potpisan ugovor u Velikoj vijećnici u Slavonskom Brodu. Vodeći partner je Centar za razvoj i podršku (CRP) sa sjedištem u Tuzli (BiH), a ostali partneri su: Tuzlanski kanton (BiH), Zelena akcija sa sjedištem u Zagrebu (HR), Brodsko-posavska županija (HR), i Brodsko ekološko društvo iz Slavonskog Broda (HR).

Svečanosti potpisivanja ugovora prisustvovali su Marko Nišandžić program direktor CRP-a i menadžer projekta, Stella Ameri v.d. ravnatelj Agencije za regionalni razvoj Republike Hrvatske, Salmir Avdibašić, pomoćnik ministra za razvoj Tuzlanskog kantona, ministrica Ministarstva regionalnog razvoja i fondova Europske unije RH Gabrijelela Žalac, župan Brodsko-posavske županije Danijel Marušić, i drugi.

U 27 mjeseci koliko se projekt planira provoditi investirat će se u energetske obnovu objekata 7 osnovnih i srednjih škola u projektnom području (Brodsko-posavska županija i Tuzlanski kanton). To su: U Brodsko-posavskoj županiji: (1) OŠ Sibinj; u Tuzlanskom kantonu: (2) OŠ "Ivan Goran Kovačić" (Općina Gradačac), (3) Druga osnovna škola Srebrenik (općina Srebrenik), (4) OŠ Gornja Tuzla (Grad Tuzla), (5) OŠ Sapna (općina Sapna), (6) OŠ Omazići (Općina Banovići), i (7) Mješovita srednja škola Kladanj (Općina Kladanj).

Dodatne aktivnosti projekta uključuju prekogranično 4-mjesečno takmičenje osnovnih i srednjih škola u projektnom području u uštedi energije (primjenom ne-investicijskih metoda, tj. promjenom ponašanja), pri čemu će svaka od dvije škole pobjednice (jedna u BPŽ i jedna u TK) kao nagradu dobiti instaliranje fotonaponskog solarnog sistema i opremanje "solarne laboratorije" (koje će uz mentorstvo eksperata Centra za razvoj i podršku i Zelene akcije, izvršiti učenici i nastavnici škola-pobjednica).

Također u planu je i prekogranično takmičenje učenika-pojedinaca osnovnih i srednjih škola u projektnom području u IT/tehničkim inovacijama u oblasti obnovljivih izvora energije, pri čemu će 20 najuspješnijih inovatora iz Brodsko-posavske županije i Tuzlanskog kantona imati priliku izraditi /tehnički unaprijediti svoje inovacije na 7-dnevnom ljetnjem kampu mladih inovatora koji će se održati u Brodsko-posavskoj županiji.

"Čast mi je da danas potpisujemo ovaj vrijedan projekat koji je ocijenjen kao najbolji od svih pristiglih aplikacija. Zahvaljujemo se na saradnji svim partnerima koji će zajedno sa nama učestvovati u implementaciji projekta. Projekat ima posebnu važnost jer je prekograničnog karaktera i značajan je jer će obuhvatiti veliki broj aktera tokom implementacije" istakao je Marko Nišandžić.

"Izuzetna mi je čast da možemo potpisati ovaj ugovor, to je veliki projekt koji se bavi ekologijom kroz razne vidove aktivnosti, zajedno sa našim partnerima iz Tuzle. To su projekti energetske obnove škola, do raznih akcija gdje se promovira zdravo življenje i podiže ekološka svijest" - kazao je župan Danijel Marušić.

"Projekt je posebno zanimljiv zato što obuhvata aktivnosti koje će promovisati energetske efikasnost i zaštitu okoliša a imat će i takmičarski karakter. U projekat će biti uključeno više od 29.000 učenika, nastavnika i direktora škola u projektnom području". – istakao je Salmir Avdibašić, pomoćnik ministra za razvoj Tuzlanskog kantona.

"Drago mi je da možemo potpisati vrijedan ugovor iz prekograničnog programa Hrvatska-Bosna i Hercegovina-Crna Gora, to je trilateralni program Europske trilateralne suradnje koji vodi naša Agencija za regionalni razvoj. To je projekt koji je ocijenjen kao najbolji u 1.pozivu i čast mi je i zadovoljstvo ovdje biti prisutna, a isto tako s obzirom na temu da je vezana za našu djecu, to je nešto što veseli i što će donijeti neke nove inovativne situacije važne za škole i energetske obnovu škola o kojoj svi puno govorimo. Ovo je isto jedan od doprinosa projektu "Slavonija, Baranja i Srijem", rekla je uz ostalo, ministrica Gabrijelela Žalac.

Projekat se implementira u okviru INTERREG projekta IPA prekogranične saradnje Hrvatska –Bosna i Hercegovina – Crna Gora 2014-2020.